



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

14. Kalenderwoche – ab 05. April 2009

Dodengräbor

Isch hab das ja schon immor gewussd, dass dor alde Margs danähm laach mid seim "Gabidahl" in drei Bände un ooch mid dähm Mannifesd! Brolledarior allor Ländor voreinischd eisch! Das is mir schon zu DDR-Zeidn schbanisch vorgekomm! Wobei dazumals wars ehm mähr, was de fiehrende Rolle vons Brolledariad bedroffn had. Nee, das Brolledariad had nisch de fiehrende Rolle gehabd, sondorn de Schlummorrolle! Isch bin ja dazumals ooch e Schdigg vons Brolledariad gewähns. Isch weeiß doch, wie mir die ganze Bolledig am Hindorn vorbeigegang is. Ooch was de Bauorn bedreffn dad - die warn ooch nisch bessor! Nee, vonweeschn Arbeidor- un Bauornschaad... - Affandgardn un so! Isch bin Sonndachs in mein Schreborgardn gegang un hab gehoffd, dass isch irschendwann een neun Drabbi krisch. So is Brolledariad gewähns!

Un am Ende isses dann ooch noch mohndachs off de Schdraße geloofn, das Brolledariad, un had dähm scheen Sozjalismus gänzlich dähm Gahraus gemachd. Sogahr die Mauor in Bärln hammse umgeschubbd - de Brolledarior! Nee, das sinn keene Beamde odor Indelligenzlor gewähns. Das isses Brolledariad gewähns. Das had dor alde Margs dodahl falsch eingeschädzd.

Abor ooch was jedzde dähm Gabidalismus bedreffn dud - dähr Margs dachde doch, dass de Gabidalisdn mid dähm Brolledariad ihrn eischen Dodengräbor broduziern dun. Ja, dähr had gegloobd, dass das Brolledariad eenes Daaches de Machd ergreifn un de Gabidalisdn ins Jehnseids befördorn dud. Denksde - das Brolledariad schdehd fesd un unvorbrischlich an dor Seide dor Gabidalisdn un dud um sein Arbeitsbladz bang.

Abor ooch was de Gabidalisdn selbor sinn... die sinn fleißisch un dun dähm Wohlschdand

produziern... un gähm ehm dähn Brolledariorn Lohn un Brod! Nee, die Gabidalisdn sinn eschd de Schdidzn vom Gabidalismus. Un das Brolledariad is nisch dor Dodngräbor! Alles falsch!

De eschdn Dodngräbor, das sinn de Schlibsdräschor! Die in de Bankn nisdn dun un ausbriedn, wie se aus fremdn Geld Brofidd machn kenn. Ja, wie se eenfaches Schdroh zu Gold schbinn kenn!

Nee, nisch dor Brofidd bei de Gabidalisdn - also, bei de Undornähmor un so - dähr Brofidd is nisch das Beese - de Gabidalisdn dun ja dähn Brofidd ooch daderzu benidzn, um widdor zu invesdieren! Ooch in Forschung un so. Un zahln Schdeuorn. Dähr Brofidd dud dähn Gabidalismus belähm!

Abor wenn de Schlibsdräschor Brofidd machn dun... dann is da ja gahr keene Leisdung dahinnor! Da wird doch nischd broduzierd. Da wird doch bloß jonglierd. Das is doch alles bloß hohles Schdroh. Rein firduell, wie das heeßn dud. Firduell!

Die dun das eschde Gabidahl ausgehöhlorn. Ausgezudschn! Un nu muss das Brolledariad un annre Schdeuorzahlor - also dor Schdaad! - nu muß dähr das Gabidahl widdor offbäbbln. Vonweeschn Dodengräbor! Das Brolledariad is dor Reddor! Das is so. Dud mir leid, Genosse Margs!

Eduard Sachsenmeyer